

## Mbt; Intervistë me kryetarin e Aleancës Kosova e Re

### Behgjet Pacolli kërkon të rikomponohet Ekipi i Unitetit

**Moto; ”Unë nuk jam për atë që atyre (Ekipit të Unitetit) t’u merret e drejta të vazhdojnë bisedimet, mirëpo ai duhet të begatohet, të rigjenerohet, të bëhet edhe me njerëz të tjerë, me njerëz kompetentë, transparentë”, ka thënë dje Behgjet Pacolli, sipas të cilit në këtë ekip do të duhej të përfshiheshin politikanë të para viteve të 90-ta. Përndryshe Pacolli ende shpreson se Rusia nuk do ta perdor veton në Rezoluten për Kosovën**

### Përparim Isufi

Kryetari i Aleancës Kosova e Re (AKR), Behgjet Pacolli ka hedhur dje idenë se Ekipi i Unitetit, në 120 ditëshin e ardhshëm duhet të funksionojë në përbërje të zgjeruar. Në një intervistë për “Zërin”, Pacolli ka akuzuar liderët kosovarë dhe negociatorët gjatë procesit të bisedimeve në Vjenë për triumfalizëm të paqenë dhe për mostransparencë. Biznesmeni i njohur me seli në Lugano të Zvicrës, tashmë ka instaluar në selinë e partisë së tij lidhjen ‘live’ në mënyrë që të mund t’i drejtojë takimet e kryesisë së partisë dhe të njoftohet për zhvillimet në parti edhe kur nuk është në Kosovë.

I njohur për lidhjet e tij afariste me Rusinë, Pacolli thotë se Kosova nuk është problemi kryesor në marrëdhëniet e Preëndimit me Rusinë, përderisa “Rusia asnjëherë deri më tani nuk ka kërcënuar me veto”.

Përderisa e shumicën e kohës e kalon në selinë e kompanisë së tij në Zvicër, Pacolli tashmë ka instaluar sistemin e videokonferencës në selinë e partisë së tij në Prishtinë për të qenë i pranishëm në mbledhjet e kryesisë.

### **Zëri: z. Pacolli si e komentoni zgjatjen e procesit për zgjidhjen e statusit të Kosovës?**

**Pacolli:** Nëse i shikoni intervistat që i kam dhënë në tetorin e vitit të kaluar, kam thënë se për statusin do të flitet vetëm pas 7 korrikut. Politikanëve të Kosovës nuk u kanë dalë datat që kanë dhënë. Unë mbrëmë me keqardhje dëgjova se Kuinti ka vendosur që të bisedohet edhe më tej me Serbinë dhe në këtë rast ne këtu do të kemi status kuo.

Parlamenti i Kosovës duhet ta shqyrtojë konstelacionin e Ekipit të Unitetit, duhet ta vlerësojë transparencën e tyre, punën e tyre dhe gjithsesi ky grup duhet të konsolidohet. Ky grup nuk mundet më të tregojë gënjeshtër e të premtojë “sot, nesër...”. Ai është një organ që është zgjedhur nga ish Presidenti Ibrahim Rugova, është konfirmuar nga Parlamenti dhe ai tani duhet rikonsolidohet.

### **Zëri: Në çfarë mënyre mendoni...**

**Pacolli:** Unë nuk jam për atë që atyre (Ekipit të Unitetit) t’u merret e drejta të vazhdojnë bisedimet, mirëpo ai duhet të begatohet, të rigjenerohet, të bëhet edhe me njerëz të tjerë, me njerëz kompetentë, transparentë. Populli është lodhur duke pritur.

### **Zëri: A kërkon një vend ju personalisht në Ekipin e Unitetit?**

**Pacolli:** Unë nuk jam pjesë përbërëse e Ekipit të Unitetit, as e qeverisë, as e parlamentit. Unë nuk insisto, mirëpo ne kemi shumë njerëz me eksperiencë të cilët jetojnë në Kosovë dhe ata mund të përfshihen. Nuk është me rëndësi sa persona do të përfshihen, a do të jenë 10 apo 15, mirëpo ne duhet t’i tregojmë popullit transparencë dhe duhet të thuhet se nëse do të kemi 120 ditë tjera bisedime, për çka do të bisedohet dhe çka do të ndodh pas

këtyre 120 ditëve. Është e pamundur që t'u premtohet njerëzve, sepse ata janë të lodhur, janë nervozë dhe mund të provokohen dhe të krijohen probleme që mund të kenë pasojë.

**Zëri: Cili emër mund t'i shtohet këtij grupi?**

**Mt: Në Grupin e Unitetit të hyjnë politikanët e para viteve të 90-ta**

**Pacoli:** Do të kthehesha te veteranët. Ata që kanë qenë të involvuar në politikën e ish Jugosllavisë, bile para viteve të '90-ta. Unë kam një mik që është kryetar i një prej shteteve të ish Jugosllavisë që me dinjitet kryen funksionin e vet e që thotë vazhdimisht se problemi i Kosovës nuk është problem që lindi me luftën në Kosovë, por është një proces shumë i gjatë që fillon qysh me Kushtetutën e vitit 1974, kur Kosova ka qenë pjesë përbërëse e ish federatës jugosllave, e barabartë me anëtarët tjerë në çdo pikëpamje deri sa Serbia e mori autonominë në fund të viteve '80. Aty qëndron problemi. Kosovës duhet t'i jepet ai legjitimitet dhe të ndahet sikurse janë ndarë republikat tjera. Këtë më së miri do ta kishin bërë politikanët veteranë, e jo njerëzit që tani flasin në dimensione shumë të shkurta.

**Zëri: Si e vlerësoni punën e deritanishme të Ekipit të Unitetit?**

**Pacoli:** Pro dhe kontra. Pro është se ata kanë punuar, kontra sepse ata aspak nuk kanë qenë të sinqertë, nuk kanë qenë transparentë me popullatën. Ata janë duke punuar për popullatën, janë duke harxhuar mjetet e popullatës së Kosovës. Janë shifra shumë të larta. Ato gjëra që i kanë thënë deri më tani nuk janë treguar në realitet.

**Zëri: Nuk kanë qenë të sinqertë në çfarë kuptimi mendoni? Afatet që i kanë përmendur për zgjidhjen e statusit?**

**Pacoli:** Jo në atë. Nëse ju kujtohet mirë duke u kthyer nga bisedimet , nga darkat, nga hotelet luksoze duke thënë "fituam 8 me, 6 me 3". Në çka fituam? Kemi qenë klub sportiv? Lojë futbollit? Është dashur të tregohet për çka ëshët biseduar, cili është rezultati. Ato askush nuk i ka dëgjuar, as ju, as popullata, as unë.

**Zëri: Nëse zgjidhja e statusit po shtyhet, kjo po bëhet për shkak të kërcënimit rus me përdorimin e vetos në Këshillin e Sigurimit. Pse Rusia po tregohet kaq kokëfortë ndaj propozimit të Ahtisarit?**

**Pacoli:** Rusia deri më tani asnjëherë nuk ka kërcënuar me veto. Rusia deri në fund do të mundohet t'i ruajë interesat e aleatit të tyre. Është punë e tyre, është e drejtë e tyre, mirëpo Rusia asnjëherë nuk është deklaruar se do ta përdorë veton në Këshillin e Sigurimit. Në problemin që e ka sot Perëndimi me Rusinë, nuk është Kosova problemi kryesor. Kosova është një prej problemeve shumë të vogla që mund zgjidhet në globalitet, duke i zgjidhur problemet tjera. Ekziston problemi i shtrirjes së NATO-s në territorin e ish Bashkimit Sovjetik, demokrazimi apo pilitika properëndimore e Gjeorgjisë dhe Ukrainës. Këto janë problemet kryesore, Kosova nuk paraqet një vend strategjik, por as Serbia. Nuk janë probleme që nuk mund të zgjidhen. Janë probleme në grup, në të cilin gjendet diku edhe Kosova.

Në shtyrjen e votimit të rezolutës unë nuk e bëj fajtor Ekipin e Unitetit as udhëheqësinë e Kosovës. ajo ka qenë evidente dhe kjo është dashur t'i tregohet popullit. Nuk mundet që institucioni më i lartë i Ksoovës t'i drejtohet kosovarëve, mos u larrgoni prej vendit se do ta kremtojmë pavarësinë, e të nesërmen të thuhet se është shtyrë rezoluta. Kjo është përgjegjësi shumë e madhe dhe kjo përgjegjësi tani reflektohet në të gjitha fushat

operuese të qeverisë së Kosovës, edhe në ekonomi, por edhe në seriozitetin e obligimeve që qeveria duhet t'i kryejë.

**Zëri: Nëse nesër do të dilte për votim në Këshillin e Sigurimit rezoluta për Kosovën, a pritni veton ruse?**

**Mt: “Me Beogardin është mirë të bisedohet drejtpërdrejt, bile edhe pa përkthyes”**

**Pacolli:** Unë prapë po e përsëris atë që e kam thënë gjithmonë: Rusia asnjëherë nuk ka thënë se do ta përdorë veton. Këtë e ka thënë edhe ambasadori rus në Beograd para pak ditëve, por edhe ministri i jashtëm Lavrov. Kjo është një gjë e trilluar, mirëpo, ata me fuqinë e tyre po mundohen të shtyhen negociatat gjë që do t'u konvenonte momentalisht, vetëm momentalisht, konsolidimit të qeverisë serbe. Asgjë tjetër. Por është dashur t'u thuhet në sy qeveritarëve të Beogradit: Kosova asnjëherë nuk do të jetë më nën Serbi, ka marrë fund ajo punë. Ata e dinë këtë më mirë se ne në Kosovë. Sot çdokush e din në Serbi se Kosova nuk i nevojitet më Serbisë. Ata e dinë se është kryer problemi i Kosovës. Është mirë që Serbisë t'i thuhet se Kosova do të jetë aleat që do të vazhdojë të punojë me Serbinë, nuk do të ketë mur ndarës mes Kosovës dhe Serbisë, mirëpo do të jenë dy aleatë me të drejta të barabarta ndërkombëtare. Duhet të bisedohet dhe, nëse ka nevojë edhe të shkohet në Beograd, ose ata të vijnë në Prishtinë drejtpërsëdrejti. Të bisedohet bile edhe pa përkthyes...

**Zëri: Edhe pa ndërmjetësues...?**

**Pacolli:** Ndërmjetësuesit gjithmonë do të jenë aty. Mirëpo duhet të bisedohet në mënyrë të drejtpërdrejtë dhe t'u thuhet se çështja e Kosovës është e kryer dhe tani mund të bashkëpunojmë në fushën kulturore, arsimore, të shëndetësisë apo në ekonomi. E dijmë se ndoshta do të jetë humbje kohe, por të jepet edhe kjo shancë. Për mua personalisht nuk është katastrofë e madhe nëse shtyhet rezoluta për 120 ditë, mirëpo ne duhet të shkojmë më të përgatitur dhe të dijmë çdo ditë çka po ndodh në ato bisedime.

**Zëri: Çka mendoni se duhet të bëhet gjatë këtyre 120 ditëve?**

**Pacolli:** Unë besoj se duhet të punohet për zgjedhjet dhe për këto 120 qeveria dhe parlamenti duhet të punojnë me intensitet shumë të lartë. Po të vinte pavarësia këto ditë, ne kemi qenë shumë të papërgatitur. Ne nuk kemi as simbole. Është absurde që një grup njerëzish e hapin konkursin për simbolet e Kosovës, sikur të jenë ato një vepër artistike. Kjo gjë duhet të bëhet në parlament dhe parlamenti ka qenë dashur ta zgjedhë një grup për ta hapur konkursin. Të merret Ekipi i Unitetit me këto gjëra është një absurd që mund të ndodh vetëm në Kosovë dhe askund tjetër në botë. Ne ende nuk e dijmë me cilin flamur do të festohet pavarësia. Ky është një dëm i madh. Pas 120 ditëve ne duhet t'i kemi të gjitha të gatshme, Kushtetutën, flamurin, simbolet tjera.

**Zëri: A jeni duke vazhduar lobimin për pavarësinë?**

**Pacolli:** Unë që nga tetori i vitit 2005 në vazhdimësi jam duke vazhduar lobimin dhe rezultatet e këtij lobimi në SHBA kanë qenë evidente. Me fuqinë që kam jam duke punuar në Uashington qe dy vjet dhe të njëjtën gjë jam duke e bërë që nga shtatori i vitit të kaluar në Rusi.

**Zëri: Cilat janë rezultatet e lobimit në Rusi?**

**Pacolli:** Unë besoj dhe gjithmonë duhet thënë se janë pozitive. Ndoshta ideja e Presidentit (të Francës), Sarkozy ka qenë kompromisi i fundit politik me Rusinë. Asaj i

jepet kjo shansë, ne duhet të presim, mirëpo tani ne duhet të shkojmë me njerëz që çdo ditë duhet të raportojnë në mënyrë transparente dhe të sinqertë.

**Zëri: Jeni optimistë se Rusia në fund do ta pranojë propozimin e Presidentit të Francës?**

**Pacolli:** Ajo nuk është ide e tij (Presidentit Sarkozy). Është konkluzion i një marrëveshjeje e cila nuk është e shkruar sot.

**Legjenda :** “Është mirë që Serbisë t’i thuhet se Kosova do të jetë aleat që do të vazhdojë të punojë me Serbinë, nuk do të ketë mur ndarës mes Kosovës dhe Serbisë, mirëpo do të jenë dy aleatë me të drejta të barabarta ndërkombëtare. Duhet të bisedohet dhe, nëse ka nevojë edhe të shkohet në Beograd, ose ata të vijnë në Prishtinë drejtpërsëdrejti. Të bisedohet bile edhe pa përkthyes”: Behgjet Pacolli, kryetar i AKR-së